

Carlo Dariol

'A meonguria

Naranze o mandarini? No vée dubi, da pìcoeo: mejo 'e **naranze!** Pì grande, pì piene de sugo... e, pì de tut, co manco semenze, sol una ogni tant. I **mandarini**, al contrario, jera fastidiosi: tuti pieni de semenze, anca pì de uno pa' spichio, che te tochéa star là a spuarli uno par uno. Certo, jera chi che paréa zo tut, ma mi no jere bon: 'e semenze vée da spuarle fora, una a' volta. Magnar un mandarin jera un cruzio. Cussì, quando che é vegnù fora 'e **clementine**, col gusto dei mandarini ma senza semenze, son stat contento. Oh, my darling Clementine...

Meón o inguria? Dess forse diràe meón, o comunque “boni tuti do”; ma da bocia quel del meón jera un piazer da grandi, massà rafinà par chi che no vea ancora svi'upà el senso del gusto; sicuramente jera mejo l'inguria, pì fàzie, pì dolze... ma... anca là: che rognà tute chee semenze! Quando d'istà, sora a' tòea in mezo al cortìo, vegnéa tajada l'inguria, el desiderio jera che te capitesse na feta senza semenze, tuta rossa e gnanca un puntin nero; e ogni tant capitéa el tajo splendido, tut ross co gnanca un puntin nero, almanco su uno dei do lati. Che goduria! E jera squasi mejo na feta streta senza semenze che una grossa ma tuta piena.

I tosatèi sogna tuti de far el calciator o l'astronauta, opur calcossa a metà via tra i do, ossia 'l inventor. E mi, come tuti i boce, oltre che de zìogar co Falcao o Platini e de essar el primo a finir su Marte, sognée de inventar el frigo che se inpenisse da sol e 'a machina che va a piss; ma, voéndo restar coi piè par tera, fasendo incroci e rincroci, sognée de inventar 'a **meonguria**.

I pì svej varà zà capìo: se trata del frut ross co 'a scorza verde col gusto de l'anguria, ma co tute 'e semenze ingrume al centro, come int'el meón; cussì, na volta tajada a metà e netàa in mezo col cuciaro, se pol magnarla beati senza cruzi e patemi, senza sentir 'e semenze soto i denti e doverle spuar a ogni bocon.

Dopo qualche ano – intant me jera passàa 'a fissa de finir su Marte (a veda cossa?) – ho scoperto che i vea inventà 'e **angurie cubiche**, fate cressar dentro un vaso quadrato, che stea dentro na bea scatoea de carton decorà; ma, dise mi, che raza de invenzion éa?! Degna de star in parte ae naranze zà peàe che vende certi supermercati! Vere e proprie stupidàe. E 'a meonguria? No, a quea nissun al mondo paréa voérghe pensar. Epur m'é zà capità che me vegne in mente na roba che no esistéa, e poc dopo calchidun la inventa. Tanti ani fa, presenpio, pena che é vegnù fora Internet, vée imaginà na piataforma dove che tuti poéa ndar iscriverse e trovar 'e foto de quei che no i vedéa da vinti ani; parché, a volte, uno ha 'a curiosità de saver come e dove che 'l é finìo el tipo o 'a tipa conossù(a) in spiaja int'el Setantaoto. E do ani dopo el genio de 'a montagna dee Zuche no'l te inventa Fessbucl!

Poc dopo m'é vegnù in mente, intanto che sul me computer me fée 'a me racolta “multimediale” e piena de “linc” co tuti i pì bei articoi de storia e arte e matematica trovai in Internet, che na enciclopedia libera sol web a cui poesse contribuir no sol che i piovani

ma anca 'e massere (parché se sa che sa pì el piovan e 'a massera che el piovan lu lu sol) 'a saràe stata pì completa e onesta. L'ano dopo i véa inventà Vichipedia.

E 'a meonguria? Gnente

Na volta g'ho domandà a un bravo botanico come che se fa a incrosar 'a pianta del meón co quea de l'anguria; co g'ho spiegà el parché el s'à mess rida: «E se te vien fora el anguèon?» Osignor: coi OGM no se sa mai dove che se va a finir. Da ignorante in materia, pensée che anca là calchidun vesse fat esperimenti e se vesse maeà. Sol dopo un per de minuti ho capìo cossa che 'l é. No, el anguèon no la é na maeatìa, e no 'l é gnanca uno che te varda mal pa' 'e to idee strane: el anguèon 'l é el meón che, inzeve de ver tute 'e semenze ingrumàe al centro, le ha sparse dapartut in mezo a' polpa: na vera condana.